

欽  
定  
全  
唐  
文

欽定全唐文卷六百四十二目錄

王起 二

瞽者告協風賦

雨不破塊賦

五色露賦

庭燎賦

堯見姑射神人賦

漢武帝遊昆明池見魚銜珠賦

白玉琯賦

墨池賦

獺皮書袋賦

昆明池習水戰賦

轅門射戟枝賦

墨子迴車朝歌賦

雍時舉燿火賦

虔裡六宗賦

祠靈星賦

延陵季子掛劍賦

斗間見劍氣賦

切玉劍賦

照寶鏡賦

蒲輪賦

洗乘石賦

宣尼宅聞金石絲竹之聲賦

冰蠶賦

浪井賦

結網求魚賦

烹小鮮賦

欽定全唐文卷六百四十二

王起二

瞽者告協風賦

以審音靜專修職知候爲韻

瞽惟審聲風實應候候至而厥風肇扇聲和而有瞽斯奏  
知夫天道則清泠必聞揚於王庭亦威儀可究所以贊欽  
若明敬授先五日而可傳信三推而不繆於時凜冽方謝  
溫仁始宣雜蔥蘢之佳氣和郁靄之祥烟樂師乃告平野  
臨大田其視則惟昧其聽則惟專寧體於舞松之間得其  
煦嫗傾耳於偃草之際宣彼暄妍曰此融風將聞於天旣

而進退匪徐周旋可則逶迤於紫殿之下俯僂於丹墀之側豈無相於俚俚方鞠躬而翼翼迺進而言曰陛下以美利利四海以仁宥宥萬國調玉燭而設邦教法銅渾而立人極所以八風不姦六律無忒臣以樂吏之賤謬知君子之德先王所寶惟穀所大惟食必俟協風以候力穡順時而教導蓋國之章有聲而薦聞乃臣之職今者起幽谷拂平林蕭條注耳寂寞拂襟有薰兮動地之氣無颯然鳴條之音達勾萌其和以布庠錢鏐其儀可尋且兢兢懍懍是微臣音之審習習颺颺彰陛下德之修固宜答休徵乘麗

景躬千畝率萬井諒神倉之委積則齋宮之清淨表聖時  
之威若昭國典之思永皇上垂拱無爲居高聽卑察邇言  
悅矇眵之告咨故實敦稼穡之宜謀盛禮度宏規豈號公  
之言是則是效而周王之代不識不知

雨不破塊賦

以微雨流潤用  
表豐年爲韻

國有休徵天作零雨不爲霖以破塊自呈祥而潤土旣霑  
旣足克成五稼之豐不疾不徐詎作三農之苦惟雨也映  
於遙天惟塊也列於大田彼以泛灑爲利此以生植爲先  
元雲不開色霏微而方密黑壤相映形磊落以皆全詎爲

暴於終日自成功於有年觀其散漫初來空濛如振不遺  
一撮之小不爽一旬之信滋螻螳之穴何患沾濡帶蚯蚓  
之形亦懷膏潤其色如晦其飄甚微纚連異質優渥同歸  
如原野之霧合似隴畝之塵飛色潤方圓形沾大小東作  
之耕斯著西成之功必表青黎不散佇秀麥之芄芃白壤  
常存宜散絲之皎皎是知妖魃見也則枯旱爲憂商羊舞  
也則泥塗見修孰若霖霖微清滂沱不流所以見太平之  
美所以彰至聖之休故宜美土疆資播種宣老圃之志作  
曾孫之頌祁祁美瑞九土之澤克施每每有形三日之霖

勿用是知雨無破塊年必屢豐積而不載感之則通何沃  
土之不浹何瘠壤之不同夫如是則受塊之人共欣其天  
賜擊壤之老將明其帝功

五色露賦

以率土康樂  
之應爲韻

露表嘉瑞國昭元吉發五色以斯呈掩百祥而非匹輝光  
駭目知泛濫之惟新變化殊姿覺淒清之有失若非澤無  
不被化無不率則何以感之於是天榮之於聖日爾其寂  
歷地表希微天宇無聲而零有色斯覩始暖空而雜糅俄  
泣草而周普霑於衣也皆成黼黻之衣潤於土焉更謂苴

茅之土且其白能受采朱則孔陽青映苔而轉麗元點漆  
而有光旣炫耀於衆彩終錯雜於中黃儻在琉璃味無忝  
於甘醴如浮葭莢色詎變於凝霜何滑令之膏潤有煥乎  
之文章固可以扶壽而愈疾俗泰而時康徒觀夫泥泥未  
晞灩灩旣落珠華點綴日華昭灼無煩勒畢之求方成曼  
倩之樂散東陵之上乍混其瓜灑西山之中更迷其藥其  
凝厭浥其布葳蕤鶴將警而未測蟬欲飲而猶疑何紺霧  
而喻矣何卿雲而比之則知墜露成文休祥有證實我后  
之冥感掩前王之嘉應

庭燎賦

以早設王庭輝  
映羣辟爲韻

王者崇北辰之位正南面之威赫朱燎以具舉列彤庭而  
有輝助彼皇明可燭於夜色叶茲睿哲引曜於宵衣信乎  
令典有作舊章不違當其冠劍鏗鏘環珮昭晰戔戔爭赴  
肅肅就列聽玉漏而未央仰紫宸而初爇珠旒將出方熠  
熠以星懸綵仗徐來已煌煌而電設九儀稍布六樂爰分  
代星光之照曜雜佳氣之綢繆騰輝於鴛鷺之行若離若  
合委照於熊羆之旅或友或羣昭昭彰彰紫氣紅光聲明  
煜燁百物熒煌覩炎上之有赫知臨下之無荒遠而瞻之

謂焚裘之烟昭儉於晉帝迫而察之似流屋之火呈瑞於周王金釭莫齊銀燭非競長風乍拂高燄彌盛華裘燦爛以相鮮猛虞攬拏而交映其容烈烈其明杲杲附寒者覺其春深假寐者疑其曙早則知統四海朝百辟勵夙興勤夕惕佐盛儀而有待惜流光而無斁昭其明也叶天鑒之穆清望而畏之契天威之咫尺彼燿火秦舉神光漢覲何足示來儀之容呈入覲之績則知我皇立人之程爲國之經旂淠淠而咸造鸞鏘鏘而可聆萬宇又多士寧豈徒美君子之至在宣王之庭

堯見姑射神人賦

以聖德之崇窅然欽道爲韻

帝堯以化成於萬國歌宣於九德出汾水之陽經姑射之側峯巒交映若覩神人之形冰霜相鮮皆呈處子之色若非感而遂應靈而不測何以見不死之庭當至人之域始其厭宮室出茅茨駕鸞輅建羽旗若光若滅乍合乍離寓目於巉巖之頂駐蹕於沮洳之湄爰按節而至矣乃傾蓋而望之倏而五雲繚繞羣仙縹緲出碧嶺之崇崇臨丹邱之窅窅瞻童顏之麗綽約則多觀羽服之鮮穢褫非少集其侶乍謂崑崙之巔狀其居不異蓬萊之表由是賅山岳

矚天溥旣元覽而旨遠亦高蹈而思深乃曰我以萬姓臣服八荒君臨蓋天下之至貴亦域中之所欽安知阻茲崖巘隔彼岑峯有吸風之人遐不可見仰承雲之客高不可尋旣而儼珠旒端玉藻增肅穆之敬念希夷之道見仙人之岳岳徒仰高山望鸞鶴之翩翩且輕大寶旣而求之不得瞻之在前念四子而莫來莫徃思一人而無黨無偏乘白雲而何及引黃屋而來旋故能戒以無怠防於未然向使忘鶉居之性徇龍駕之盛則光宅之德徒聞乎以邀以遊比屋之聽詎見乎乃神乃聖我皇明四目達四聰惟神

也愛而見惟聖也感其通不窺仙於飲露不問道於順風  
則姑射之神未爲盡善陶唐之主未足比崇

漢武帝遊昆明池見魚銜珠賦

以題爲韻

漢武帝出咸京遊昆明覲潛魚之躍吐靈珠之英珍不藏  
川是獲媚川之色仁苟及物必能動物之誠先是撥刺巨  
鱗傍畔水裔或詹何所中或任公所制利鈎貫鰓而錯落  
長絲縈岸而掣曳殘瘁不振沉浮未濟是用脫其鋒解其  
綴索於枯肆初同患於波臣銜以圖書終乃小於軒帝他  
日擇良辰鏡清流舍鑾輅登龍舟不徐不疾以遨以遊於

是傍臨桂棹遠映珠旒或銜或戲似驪龍之頷將吐若明  
若滅比瓊蚌之胎未收光芒稍逼輝赫難儔實有意於豐  
報固無情於暗投含幽育明轉煌煌於畫鷁振鬚掉尾時  
熠熠於牽牛旣而千官動色百辟咸覩且曰修其文耀其  
武澤之廣恩之溥雖彼池中之物亦懷天下之主報德而  
入於隋掌此類蛇銜感音而失於晉庭彼慚鶴舞况乎燭  
龍奪艷石鯨獨吐泣鮫人之目固不可倫綴神女之軀曾  
何足數由是儼天儀俯洪池映唼喁而未出炫的皪而方  
施然後得麋寸之彩失圓折之規則皎皎駒來自掩白狼

之美翩翩雖至徒稱赤雀之奇是知人能博施物亦幽贊  
無煩罔象之索詎假闌干之貫向若安其忍棄其難俾頌  
首長逝劫灰未散安得此樂於江湖見託於河漢則玉殿  
之側誰綴其玲瓏金輿之傍莫矜其照爛以言於魚也厥  
道斯存以言於人也如何勿敦則受嘉惠蒙渥恩得不效  
節於當代而垂名於後昆

白玉琯賦

以神人來獻以  
和八音爲韻

玉琯絕倫受之於神希夷感化皎潔含真旣比德而爲美  
亦諧音而可珍肇自夏絕發茲璘玢匪剖石於和氏乃成

器於羽人伊昔帝鄉所傳王室未獻虹彩潛射蜺旌並建  
鸞鶴映之以生光烟霞奏之以適願同鈞天之樂靈境獨  
聞在層城之宮人寰共遠旣而舜德有感王母來過獻之  
皎皎捧之峩峩重華遂得其符瑞百靈永謝其琢磨儻比  
以爲笙知鳳吹之不遠如秉之爲笛曷龍吟之足多豈徒  
嘒嘒於茲竹碌碌於隨和若乃觀其戾止察其所以質非  
竽籟韻含宮徵圓其表而合規虛其中而通理光連素手  
雖提握之不忘色映丹唇在吹噓而成美其舍也無聲之  
樂其獲也無疆之祉虛而不屈老氏之籥乍同磨而不磷

戎人之環孰比况乎知白自守無瑕可猜色迷瓊樹影雜  
瑤臺懷清越之音不求於扣感馨香之德不召而來固仙  
侶之所執非玉人之取材則知素琯之祥元理可察將使  
律合於六音諧於八傳真人之逸韻資聖主之大夏宜乎  
藏九重之深爲百代之欽騰輝爛爛和俗懽懽使伶倫之  
簫自漸叶律俾女史之管空愧垂箴無以窺天之心而忘  
至德之音

墨池賦

以臨池學書水  
變成墨爲韻

墨之爲用也以觀其妙池之爲翫也不傷其清苟變池而

爲墨知功積而藝成伊昔伯英務茲小學棲遲每親乎上  
善勤苦方資乎先覺俾夜作晝日居月諸挹彼一水精其  
六書或流離於崩雲之際乍滴瀝於垂露之餘由是變黛  
色涵碧虛浴玉羽之翩翩忽殊白鳥濯錦鱗之漈漈稍見  
元魚則知自強不息允臻其極何健筆之成文變方塘而  
設色映揚鬢之鯉自謂奪朱沾曳尾之龜還同食墨沮洳  
斯久杳冥不測愛涅者必染其緇知白者咸守其黑蘋風  
已歇桂月初臨元渚彌淨元流更深所以恢宏學海輝映  
儒林將援毫而悅目豈泛舟而賞心其外可察其中可見

同君子之用晦比至人之不炫冰開而淳漆重重石映而  
元圭片片儻北流而浸稻自成黑黍之形如東門之漚麻  
更學素絲之變究其義也如蠶篆之所爲悅其風也想鳥  
迹之多奇將與能而可傳可繼豈謀樂而泳之游之恥魏  
國之沉沉徒開墨井笑崑山之浩浩空設瑤池專其業者  
全其名久其道者盡其美譬彼濡翰成茲色水則知游藝  
之人盡以墨池而爲比

獺皮書袋賦

懿彼元獺生於水鄉始殺身於河湫卒成器於書囊仍彼

殘文不假乎雕刻裁以新製自合乎圓方旣出納而斯取  
亦扁鐫而有常想夫下泉委質上天致祭紫府咸萃丹誠  
若契宜介福以全生奚徼禍而致斃苟利人以獲助甘成  
器於此際則有攻皮之工嘗巧於中遺文不剪輕縷潛通  
圓其蓋則合而能固柔其質則用之不窮謝水府之至樂  
入書林而見崇外也蒙茸毛有所傳中也駢坐書有所聚  
韜蔚矣之文章秘煥乎之詞賦彌縫則密豈亡三篋之書  
周旋必復且涉九衢之路若乃青簡疊至尺牘交馳藏篋  
篋而不可置懷袖以攸宜必資之以善閉克守之而不遺

雖納以魚牋乍似噬魴之日臨乎墨沼寧同赴汨之時動  
必依人靜而掛壁滿貯攸戒緘滕受益其來也江海至深  
其潔也波瀾所滌掩青囊之貯卷異豹文之成烏旣翰墨  
之居珍幸提攜而無斁

昆明池習水戰賦

以將伐遠戎先  
修武事爲韻

伊昔漢武將吞遠戎鑿昆明之澹澹習水戰之雄雄池則  
無涯寫滇河之象戰思拓土合水國之風將以規遠畧恢  
聖功遐方不擁獷俗來同豈徒列萬艘之邈迤翫一沼之  
沖融乃命搜舳艫徵卒伍刻楫櫂備金鼓得飲飛於荆江

獲文身於越土榜人來萃水客斯覩介夫伋伋將牽牛以  
交映畫鷁呀呀與石鯨而對吐奚去陸以習坎方整衆而  
耀武武之耀兮昭彰衆之整兮張皇攬繁弱拔干將可以  
摧南方之銳可以挫北方之強列萬夫之貔貅雜五兩之  
雪霜躍彼漣漪見魚麗之出遊乎洲渚知雁翼之張觀乎  
作軍政臨武事進退有節沿洄趨利或連兵而鳥逝或應  
鼓而麋至令肅而必平戎虜教成而不可奪帥四遐縱觀  
士德增修森森兮烈於武庫赫赫兮敞以層樓文物驚乎  
海若聲名震乎陽侯河漢爲之震蕩劫灰爲之沉浮則知

水陸之謀無闕則遐荒可伐舟車之利克全則珍寶爭先  
故能立功於窮裔垂盛於當年國家以四海波清九夷草  
偃感彼洪沼猶連漢苑餘波尚在空發藻以潛魚水戰不  
修恥勞師以襲遠實我皇之清淨宜福祿之來反

轅門射戟枝賦

以一箭解圍人  
中之俊爲韻

矯矯呂公凜千載之英風立轅門而耀武百夫之特射戟  
枝而騁技一矢稱雄所以解紛爲智和難成功豈徒用壯  
於六鈞之妙務能於百步之中當其劉氏興戎袁公結陣  
旣禍拏而莫解亦兵纏而屢振鬬貔豹而不寧若蚌鷸而

相徇是用假我手弓救其血刃則萬夫駭目不在於和容  
二憾革心必資乎中俊闕力未疲徵會於茲排其患難成  
彼宴私離坐離立左之右之森森兩軍比晉楚衷甲之日  
桓桓二帥同劉項舞劍之時是用出雄戟射小枝旣從容  
而諭旨亦慷慨而興辭乃曰射者所以明其志忠其質今  
欲轉禍爲福反凶致吉若嗤同失鵠我藝自忝其疊雙儻  
妙等麗龜爾心固宜乎如一乃展容耀示英威決拾旣欣  
分銖不違洸洸赴赴如翰如飛莫不峙其密殼釋此重圍  
彼戟在門揭然獨見立亭亭之直影引眈眈之英眄刃孤

標而霜白末斜指而目眩彎弧弨弓之際勢若月圓鳴鏑  
於矢之端光如電炫觀之者心惕聞之者膽戰固當靖難  
於五兵豈獨解顏於一箭彼容色沮我師氣振咸曰將軍  
勇絕衆藝如神蹲甲非敵措杯不倫今在座隅徒欲覺勇  
而嗇禍儻居戰陣誰當左馬而右人請懲忿於昔日願釋  
憾於茲辰盛矣哉斯會也當軍門而人無不協中戟枝而  
戰無不舍旣威加於域中亦藝絕於天下則毀其壁二人  
之訟息弄其丸兩家之難解比將軍之功實爲小者

墨子迴車朝歌賦

墨子慮厥居慎所如轉華轂遊殷墟疾朝歌爲名知非良  
邑惟時邁有度用迴德車將以擇樂國垂盛則舉足爲龜  
鏡立身乎繩墨每自西而自東咸作範而作式始其命駕  
徘徊發軔員來豈半途而有廢將由逕而無猜雜彼行人  
初儻儻而同造問於及境終檻檻而獨迴乃曰歌樂者人  
必有度朝夕者天之所賦苟名而不臧曷邑之足顧由是  
反征輪遵大路比危邦之不入同覆轍之足懼載脂載牽  
却新逕而不疑如輕如軒乃舊蹊而是遡諒無阻於寸進  
實自懲於跬步借如不戒乎謠不恆乎朝自然哀樂失節

威儀莫昭何足以枉君子之車瞻夫翼翼來長者之轍美以翹翹是用居身於克正示衆以不佻雖大道甚夷崕如九州之險大都孔邇邈成千里之遙足以戒居人警行子革詠歌之俗作道途之紀改轅不爽於歸歟反路自忘於勞止亦將趨樂土走仁里彼邑之士莫得式其軒彼邑之塵莫得及其軌宜乎非禮勿動惟貞是履與孔門而齊教將宋國而專美莫不始於迴輪而彰乎勵已嗟乎車之攸避也尚戒乎歌身之攸措也矧至於頗則懼栢人之不宿恥勝母而不過比車之旨也未足居多

雍時舉燿火賦

以享神之期候  
此爲節爲韻

雄雄雍時兮神州之壤赫赫燿火兮橋衡之象所以郊祀  
克明所以照臨是仰成形中度知有要而有倫燭幽以時  
表來顧而來享肇秦帝而有制洎漢皇而不爽伊昔克修  
羣祀大合百神聲明雲集文物星陳仰珠旒則嚴其待曙  
聽玉漏則闇然未晨晦威儀之秩秩迷俎豆之莘莘張華  
燈而其光不遠秉神燭而其明不均則雍時之舉燿火也  
莫之與倫旣而亭亭有揭燄燄方蒸於以觀百里之備於  
以昭五夜之節拂瑞雲之表乍疑乎燭龍方來入靈壇之

中又似乎神光不絕由是皚皚炳映盞斚罇彝咸若光而  
若滅罔顛之而倒之熠燿無替熒煌自持在質明而有讓  
當委照而無私殊太叔之于田盤遊是舉異齊侯之設燎  
朝會爲期薦嘉者於焉仰止執熱者難乎嚮邇電延而自  
西自東星繁而一彼一此比王屋之火空際不流似陳寶  
之光祠中乍委則雍時之義斯焉取斯燿火之作爲於有  
爲照苾苾與芬芬自明無黷燭蹒蹒與濟濟方表有儀故  
將崇其明祀立我洪規豈徒散孤光於地表煽丹燄於天  
垂而已哉國家祀典式崇舊章必授思宅中而圖大雍時

方宏法居上而克明燿火斯候足以掩前王之純懿諒介福而何究

虔禋六宗賦

以享神精潔四氣叶和爲韻

王者稽祀典竭至誠禋六宗而欽若致四海之和平宗者以尊爲稱禋者以敬爲名爰是崇而是畏必惟一而惟精則四序三光運有常度水旱寒燠災無所萌上乃擇元辰留睿想萬物備百禮往圭璧陳俎豆敞靈壇嶽立擁千官而式瞻天仗星陳覩一人之可象玉食皓皓而方積珠旒穆穆而斯仰觀乎薦在有翼而有嚴貴其誠故來格而來

享原夫禋於三辰也天宗必降嘉薦是列歆之以虔恭奠之以豐潔使兩曜合璧不爲薄蝕之虧五星連珠詎有欃槍之孽其禋於四時也將以恤蒸人感明神使還周克序鱗次相循攷之於葭灰不愆於候調之以玉燭無奪其倫其祭寒暑也將以周萬類均二氣時當元律無墮指以成災節變朱明曷流金之足畏其祭水旱也則天無作孽人獲大和祲魃不生乎災熾商羊自屏於滂沱相彼六宗皇聖是接戩穀降而肸蠭文物紛其曄煜聆夫管磬知律呂之克諧列彼苾芬信幽明之允叶然後一德不二三皇可

四地發嘉生天呈上瑞致百神之職興兆人之利君子謂  
大舜之克禋惟我皇之能備

祠靈星賦

以工奏雲漢祈  
彼嘉穀爲韻

祝有典兮惟敬天垂象兮在崇奉靈星之德祈戩穀是豐  
乃命宗伯詔樂工徵舊典於祝史答嘉貺於元穹以夫靈  
者降休祐星者燭宇宙況出應天田見彰農候足使野夫  
致享祠官敬授禮而有異豈雩禱之同登樂則必倫乃絲  
簧之並奏於是驗星紀稽帝文覩農祥之晨正彰土膏之  
脈分奠玉盃於青帝用潔牲於白雲乃啟雲壇爰登玉瓚

拜天貺之昭彰見星光之照爛列黍稷而馨感明靈奏和  
樂而聲聞霄漢瞻彼太極載乎紫微神之至今雲映曖靈  
之降今日揚飛列綴兆於峻舞徵歌頌於絲衣禮成文兮  
樂終變神胥樂兮儼將歸雕豆玉觴自殊器於宗祀青圭  
紺席乃叶禮於禳祈懿夫高祖建始福祿奚委禮用太牢  
名存漢氏皇家復位樂器是備異晉皇之配饗因南郊而  
道弛禮容盛兮在今時祀豐兮邁彼且夫與衆祈禱曷不  
稱嗟溥天之惠罔不休嘉豈比夫賈生弔屈空祀三閭之  
水漢皇幸蜀虛禱萬里之沙者哉是知我禮有肅苾祀不

黷告農可以勸躬耕祀聖可以厲浮俗固宜不害三時方  
成九穀然後觀觀澤之禮承屈天之福庶憑之而多祐觀  
秋成於西陸

延陵季子掛劍賦

以冥會心許暗  
無我欺爲韻

循修隴樹兮掛劍於茲所以表徐君之所欲明季子之不  
欺予取予求昔藏心而可測一生一死終棄寶而如遺蓋  
烈士孤標之節而神明幽感之時當其昔結歡娛從容不  
阻孤鋒乍拔密坐之所彼眷眷於目擊此默默而心許諒  
他日而來思非伊人而誰與及夫厯聘上國言旋東吳訪

舊友遵舊途亦當開寶匣獻鹿盧何閔水兮不待弔荒埏  
兮已蕪由是執龍泉而慷慨望馬鬣而踟躕想間歲之披  
雲忽然而在撫今辰之切玉視之若無且曰器可謀新室  
寧欺暗解腰間之善結仰樹杪而延瞰乃脫白刃推赤心  
耀宿草之煌煌懸拱木之森森錯落金鑲疑夜月而生隴  
晶瑩霜鍰謂春冰之在林龍形蜿蜿而未化蛟枝亭亭而  
欲尋解佩義廣脫驂感深英聲遂騰於萬國善價不顧其  
千金嗚呼劍之擲也無前人之行也必果誠去彼而取此  
非祈君之祐我無宿諾匹之以庸庸不食言方之以瓌瓌

向若茂元壤恡青萍重提攜於掌握輕耿介於心靈則三尺之中空騰雲而漫漫重泉之下將愧色於冥冥無言者道之宏不約者信之大峻節卓以特立義風紛而繁會盛矣哉掛劍之名將萬古而不昧

斗間見劍氣賦

以神物下潛精光上射爲韻

彼玉斗兮列乎太清此寶劍兮埋於豐城遙天式瞻諒闌干以成象厚地斯秘遂熠爚而騰精若非五山錯秀六合含英則何以下藏鋒於穎脫上作氣於貞明昔伊雷氏未占張公莫訪秘龍淵之奇彩射斗牛之異狀或雄雄於曲

柄之末或冉冉於斗杓之上金陵之王氣莫齊函谷之紫  
氣應讓可大可久乃聖乃神嗟日月之逾邁怨土石之湮  
淪劍也氤氲連白榆與紫貝星焉昭晰應龜甲與龍鱗下  
埋照以煌煌上和光於厯厯何寶鍔兮斯隱在璇璣而必  
覲鋒惟切玉處玉匣以逾深氣則決雲每雲路而相射匪  
舍之則藏實闇然而章仰九霄而遊目知百鍊之雄鉞乍  
滅乍明有扶於佳氣若離若合更類於神光靈氣則浮利  
用猶鬱當繚繞而熒斗自表至珍儻陸離而佩身寧逢異  
物可以察三尺之滯淹可以見七星之沈潛石韞玉而騰

輝未專其美鼎居汾而見氣徒有其占固宜仰層穹求外  
野延瞰於寰城之裏冥搜於古獄之下則可以論國都驅  
駿馬是知劍氣之在斗間所以求伸於知者

切玉劍賦

以天之利刃切  
玉如泥爲韻

彼神劍兮出昆吾之溪旣成形而若水遂切玉以如泥玉  
則貞堅誠齟齬而難入劍惟銛利將脫穎而莫齊是以從  
心剖判應手提攜入水蒼之文乍同夫淬水破雞冠之赤  
且異乎割雞當其瑾瑜外來球琳畢萃磨而不磷用之不  
匱以藏乎密地出匣而宣利遊恢恢之刃瑕不掩瑜剖礫

礫之形刃有餘地是知不貪其寶不愛其資苟作礪而斯  
驗將匿瑕而可遺異匱之毀焉斯爲過矣同斗之撞也於  
以碎之璨彼瓊華煥如縷切匪流血以爲害將凝肪而必  
截觸可磨之玷片片冰開縱不鈍之鋒重重瓦裂應機則  
斷投刃皆虛可以斷珪瓚可以判瓊琚雄雄今化龍之後  
璨璨今抵鵲之餘苟在鎔之金不慙於歐冶則指瑕之璧  
何愛於相如溫潤乍分陸離交燭於以慰良冶之志於以  
窒貪夫之慾耀銑而赫奕六金律刃而熒煌五玉是知斯  
劍之用也按之無下直之無前以刺鐘之聲乍移水碧以

擊柱之勢時入山元星文每臨夫韞石虹氣若斷於晴天  
然則干將所營風胡所徇或剗犀稱利或截鴻所進未若  
周王切玉之刃

照寶鏡賦

以珠寶潛翳照  
之必呈爲韻

先賢鍊金鏡之英照懷寶之精寶之產今逾秘鏡之瑩今  
至明藏諸土中雖沈埋而可恨引於地表終錯落而皆呈  
將竭工巧灼爍堅貞以通幽爲用以利物爲情豈惟雕盤  
龍而耀彩鏤飛鵲而增榮若乃金玉方潛珠璣未出或山  
藪而埋照或土石而混質連城之價蔑聞照乘之光遂失

雖卞和之欲獻我色猶深雖隋侯之見求我藏猶密然後  
玉匣啟銀華濫用物而不將不迎隨人而無固無必乃夜  
入榛蕪旁求瑾瑜冰彩前射月華正孤將善價而無隱與  
佳氣而相符在樓臺之中我用無展當藍田之下厥道斯  
殊遂使的皪珠色朗然合契皎潔瓊華洞然無翳時映山  
元之氣乍透菱花之際璞由是而成琢金因之而作礪是  
知鏡能融朗寶莫沈潛彼照膽而必徹此藏器而莫淹集  
璀璨之光鸞形乍合騰磨礪之色虹氣斯占固其涵清明  
之質體虛無之道滿堂由是而獲珍厚地詎聞乎藏寶豈

比夫魏宮之所施秦臺之所持鑒鉛華之小者曷懷異而求之況有處幽沈戢光耀愧無不琢之質復仰無私之照

蒲輪賦

以安車禮  
賢者爲韻

王者崇招隱之禮作徵賢之車旣斲輪而合度亦安蒲而用諸將使邱園共賁巖穴皆虛則必旌其重貺建此大輿輪合大規取邁而行陸蒲兼柔質取坐以安居罔覆其軌轍可厯於邱墟載以歸朝盡是漸鴻之翼駕而出野方隨繫鶴之書恒翹翹而隱隱諒求士之本歟若乃山騁異人林棲隱者鳥獸之羣方雜薜蘿之衣未舍或屠釣而忘名

或版築而在野恥芟芟之帛厥禮未崇笑予予之旌好善  
猶寡然後時主側席哲匠精研載脂載牽旣攻旣堅蒲也  
採陂澤之叢有車之用輪也斲陰陽之木如日之園檻檻  
兮出中朝之禮盛麟麟兮入外野而光宣於是經營草澤  
輶轢雲烟瞻其儀無虧乎翼翼聆其響且異乎闐闐可以  
出嘉遁之碩德可以載傲俗之遺賢空谷有駒自爾而方  
縶鳴臯者鶴假我而聞天豈猶邀申公於是日徵釣叟於  
昔年則知輪之設蒲巖局是啟將毗王者之政先保賢人  
之體致萬里之安安成百僚之濟濟豈比夫織而爲席表

臧孫之不仁緝以成宮昭令尹之非禮方今雋已在官輪  
猶未安旁搜叢桂遠綴幽蘭士不病於邁種賢盡出於峯  
巒是蒲輪之禮也乃王化之端而已哉

洗乘石賦

以王者順動有  
司先成爲韻

瑟彼乘石履於聖王每寒水而濯色俾堅容而有常當宸  
駕之未嚴貞姿或翳及天步而將踐麗質斯彰於是五輅  
載轄六龍齊首森天仗而旣列嚴翠華而已久隸僕乃言  
故實是諮舊章克守正取彼流惡滌茲含垢兢兢乎映金  
車而鞠躬翼翼兮汲銀瓶而運手發璫錯之色莓苔染之

而不能注清冷之聲埃壒集之而何有皎爾鏡徹爛然冰  
鮮承玉趾而增麗拂袞衣而更妍磷磷於清淺之波自慚  
奪彩鑿鑿於激揚之水莫敢爭先匪琢匪磨不涅不磷求  
韞玉之色彰候和鸞之聲振成吾皇獻替之義我則如水  
之投叶吾皇啟沃之心我則如流之順四海是奉百禮所  
總茲石既潔一人由是而日輝茲石未晞萬騎不戒而雷  
動君惟展義官則庀司將滌瑕而蕩穢在挹彼而注茲於  
以昭卜征之候於以明望幸之期潺湲既臨似石磴瀉泉  
之狀流離欲散有山雲潤礎之姿有翼有嚴既敬既戒去

渙忽之色由是砥平吐新鮮之輝用光時邁乘石之洗也  
列周經乘石之履也合周雅內可以訪道海內外可以觀  
風天下故曰有扁斯石見於王者

宣尼宅聞金石絲竹之聲賦

以聖德千祀發  
於五音爲韻

魯恭王益宮於孔氏壞宅於闕里聞金石絲竹之聲有六  
律五音之美清泠始奏異洞庭之載張寂寞而來非鈞天  
之可視或管或磬以禋以祀徒在廟而見聽豈升堂而足  
擬當其攝齊而進拾級而前遠近猶惑鏗鏘始傳式感王  
心聘國無勞乎七十克諧聖域摠衣始化乎三千信不擊

而不考實元之而又元惟金也振春容而無闕惟竹也象  
吹噓而未歇惜惜擊石如荷蕢之初聞杳杳揮絲疑孺悲  
之來謁所以表正聲之感所以同古樂之發遐想乎返魯  
之年追思乎在齊之月迴環棟宇繚繞庭除惟恍惟惚  
如繹如心方啟乃樂可依於固將極天而蟠地豈徒舞獸  
而躍魚徐疾有則清濁不忒非審以知政非作以崇德藏  
書之壁時繹繹而難分夢奠之楹乍洋洋而未測響雜乎  
鴻鵠韻調乎宮羽絲管不形篋簞無覩固可掩歌鐘於二  
四配莖英於三五及夫鏗爾樂闕油然思深覩奧且驚夫

盈耳廣居由是而革心豈不以感上聖之旨聞至德之音  
哉皇家始崇儒禮莫先褒聖尊素王之號廣舊宅之敬儻  
逸韻之再聞播乎樂府之盛

冰蠶賦

以凝沍之境成  
彼奇彩爲韻

懿北極之寒勁有珍蠶之處冰非柔桑之是食非幽室之  
是憑託彼絳絳且不資於春煦抽其曳曳自有樂於陰凝  
旣違燥而就濕知同類而殊能爾其元律窮芳歲暮百谷  
風壯羣川冰固遊片片之凝光映重重之積素十畝之間  
兮洩洩何勞六尺之內兮涓涓正沍旣苦寒而不倦將載

績而是務觀夫如臨如履經之營之隔皚皚之積冰吐漠  
漠之輕絲朱綠曳而愈出黼黻成而是資煥乎有章豈寒  
女之能得超然獨處信夏蟲之所疑淋漓未泮組織方成  
非繰於盆非懸於井蠶事登矣必因之而剖冰繭稅求焉  
將取之而越境豈比夫風戾之所生歲單之所成蠶月而  
方育蠶器而見營安能苦其節履其貞窺之有戰戰之色  
取之有沖沖之聲匪依樹而遊奚感仙而化不筐而績奚  
假蠲爲名宜乎海人見采堯帝斯呈伊蠶蠶之繁委實生  
生之殊詭鼠遊冰下我亦來思龜生火中吾乃異彼况乎

雪霜是履鱗角多奇若解以東風或泉魚而共躍藏諸北  
陸幸凌人之見知宜乎含章勿改牽絲有待儻來獻於九  
重必相宣於五彩

浪井賦

以王者清淨  
則出爲韻

冽彼寒井契於聖王不因鑿以成質每自浪而呈祥涌呀  
呶鼓靈長比醴泉之自出異海水之不揚吾君是時清八  
區肅諸夏寶出於地符呈於野伊井有浪焉乃瑞之大者  
爾其呀豁百尋之表洶涌重泉之下狀靈濤之潛洩匪冽  
風之是假淪漣不盈觸搏恒驚窺坎窞之底有江湖之情

積而有潤於下混而不傷其清窺則澄澄乍玉甃而同色  
汲之浩浩激銀瓶而有聲鮒飛鱗而不定羊在缶而皆傾  
洎夫列宿參差曉月韜映搖珠彩而增潔涌金波而轉淨  
湯湯下激不施屏翳之功洶洶潛驚詎假陽侯之詠然後  
駭四海之目垂兆人之慶伊厚地之發祥實大君之作聖  
彼青桐素纓之飾玉檻銀牀之盛皆人力之所成固神造  
之不競宜乎光瑞典苞坎德不藏於冰不蓄於墨惟波獨  
涌惟渫可食奉我皇之飲俾上善以爲心戒我皇之窺必  
臨深以取則知并非浪不貴乎成質浪非井不彰乎聖日

比井而王化其清比浪而王心不濫稽休明而合應將汲  
引而無失彼堯人鑿而飲漢將拜而出未足以彰其帝功  
而較其靈術者也

結網求魚賦

以臨川羨魚未  
若結網爲韻

網則結緒魚方躍泉其結也疎而不失其躍也瞻之在前  
一縱一橫旣克張於萬目無小無大亦何逃於百川是以  
揚鬐振鬣噴沫飛涎初同求於發笥終取義於忘筌於是  
當巧孜孜杭精屑屑細緝絲枲解紛結絕想江湖之相忘  
遂網維之備設搖賴尾以游泳爾不厭深運素手以續紛

我思善結俾晝作夜日居月諸成茲密網念彼嘉魚庖犧  
之舊制無改良罟之新規有餘獻鮮薨之時茲爲謀始烹  
釜鬻之日此乃厥初且夫注目劬勞甘心健羨於結網兮  
何有徒噉喁而可見金盤旣設無霍霍以霏霏錦質乍窺  
徒赫赫而戰戰孰若氣奪九罟網殊一面始結繩而援設  
終在藻而咸薦疎密由已卷舒從心此紛紛而不紊彼潑  
潑而方禽亦何必不網而爲子釣斷罟而諫君臨其動則  
紛其力不費事有類於組織志未殊於經緯薦尾安在提  
綱尚未想飛鴻而則罹曷游魚兮不畏向若臨河廣恣心

賞隨揭厲之淺深當鱗甲之來往出彼嚇鰓亦同反掌營  
鱸鮪方同濺濺之施罔禁鯢鮪豈比恢恢之漏網則知無  
其備者其功畧有其具者其利博此不憊其經營彼無逃  
於潛躍夫然觸類斯長緣情可託結詩書而爲網網則有  
條驅爵祿而爲魚魚兮咸若吾所以考先賢之微言悟臨  
川之妄作

烹小鮮賦

以理大國如  
烹小鮮爲韻

有冽者泉生乎小鮮將成登俎之美必求鑿鼎之妍惟烹  
也在於不撓惟魚也貴於克全苟司味之有術諒爲政而

則然若乃海曲蘆人江潭舟子厭頒首於蒲藻得纖鱗於沼沚常窺澈澈漏於密網之中今則炎炎烹於沸鼎之裏是以激之有度爛而足恥先明水火之濟用契鹽梅之理然後合沓有聲沸騰以烹碎文弱質萬品千名以剉脆之易壞當洶湧之方驚觸之則土崩可喻安之則錦質皆成蓋以小爲貴在中和且平乃加以薑桂雜以薪燎同露鑊之白遊東前箸而不擾雖湯騰其內火烈其表惟自然於衆味終不亂於羣小旣薦尾而獲珍皆駢首而可曉向若爛之不恤撓之是刺急舒無節乎中躁靜不放乎外自然

成魚餒而不食比水煩而不大空摧鱗而莫分寧去乙而  
知害則知國喻乎鼎人喻乎魚魚之亂則烹以靜人之繁  
則制以徐鼎中之咸若天下之晏如鮮之烹也不撓人之  
理今作則將申老氏之戒用假庖人之職既不爽於和羹  
幸有光於爲國

欽定全唐文卷六百四十三目錄

王起 三

蜃樓賦

黿鼉爲梁賦

羨魚賦

焦桐入聽賦

朔方獻千里馬賦

萬年縣試金馬式賦

彈冠賦

佩刀出飛泉賦

請禁皇城南六坊內朱雀門至明德門夾街兩面

坊及曲江側近不得置私廟奏

覆廢罷讓皇帝廟奏

請進士覆試後再行放榜奏

覆奏耐懷懿太子神主狀

創造禮神九玉議

定祀九宮儀注議

銀青光祿大夫檢校禮部尚書使持節梓州諸軍

事兼梓州刺史御史大夫充劍南東川節度副  
大使知節度事管內觀察處置靜戎軍等使上  
柱國長樂縣開國公食邑一千五百戶贈吏部

尚書馮公神道碑銘

并序

莊恪太子哀冊文

欽定全唐文卷六百四十三

王起 三

蜃樓賦

以海旁蜃氣  
象樓臺爲韻

伊浩汗之鵬壑有岌嶸之蜃樓不因材而結構自以氣而  
飛浮閔然無朕赫矣難儔出彼波濤必麗天以成象化爲  
軒檻寧假日以銷憂足以掩鰲山於別島漏蛟室於懸流  
若乃霧歇烟銷雲歸月朗千里目極八紘心賞惟錯之類  
咸伏陽侯之波無響於是吐氛氲騰決滌隱隱迴出亭亭  
直上乍明乍滅舒渤澥而新鮮若合若離結麗譙而博敞

雖舟子來萃國工是仰莫不驚天地之赫靈覩并幹而成  
象赫奕奕而有光紛郁郁而難詳影臨貝闕彩曳虹梁比  
繩墨之曲直如規矩之圓方岳岳之仙乍窺於天表盈盈  
之女且媿於路傍八窗未工百尺非峻伴祥烟於巨浸雜  
佳氣於重潤仰層構之如輦必巨川之化蜃大壯冥立全  
模洞開吐噉而侔華宇呼吸而象瑰材翔鯤拂而不散賀  
燕往而復來依稀碧落想像瑤臺旁輝日域下瑩珠胎比  
落星之流點綴疑明月之照徘徊則知夫霞駮雲蔚有壯  
麗之貴棟折榱崩無壓覆之畏旣變態於倏忽亦憑虛而

髣髴豈比夫鼎居汾水赭赭以騰文劍在豐城雄雄而增  
氣方今聖功不宰海物咸在固知吐爲樓閣以全其軀豈  
爭彼魚鹽弗加於海

鼃鼃爲梁賦

以王師遠征水  
族冥感爲韻

周穆窮轍迹之所經駕鼃鼃而感靈所以濟浩汗所以通  
杳冥蜚蜚蜿蜿以代造舟之利匪雕匪刻皆連外國之形  
諒人力之不勦信神功而永寧當其師旅闐闐旌旗肅肅  
臨九江而澶汗駐八駿而蹢躅望旣濟於未濟終歎無梁  
思載沉而載浮孰能剡木得不乞靈於水府假道於介族

則龜也不得而深藏鼉也不得而潛伏旣而擘波有聲異  
狀可驚出層潭而櫛比駕飛浪而砥平連足俄維比浮柱  
之初立鏤甲疊映同版築之相成齊首而繩墨勿用曳尾  
而規模自呈其利惟博其安無傾殊滄海之龜構異銀河  
而鵲征彼詭類之可覽實至誠之所感假鼎肩以臨深託  
盤跚而習坎其勢邈迤其狀參差無遠不屆惟危具持照  
赫奕之五刃度張皇之六師乘以周旋且異琴高之鯉載  
於沈溺還符毛寶之龜漁者徒驚工人有恥同鼠共羅而  
罔及畫鴈雄虹而莫擬題之不可殊長卿之見書抱之則

難謝尾生之沈水是知伐鼉以冒鼓其用匪良解鼉而染  
指其謀匪臧孰若奮功於舟楫感聖於君王昔在深泉懼  
屑沒於其穴今符至德忽結構而成梁固蹂躪而無害將  
騰躍而有光我皇仁洽道豐文修武偃要荒畢服淳離斯  
返何必驅鼉而駕鼉勞師以襲遠

羨魚賦

客有羨魚者立河壩俯臨泉窺綠藻瞰紅蓮彈鋏之歌逾  
切觀濠之意彌堅則有賴尾殊品紫鱗異質或依蒲而自  
娛或擁芡而爭出揚鬐奮鬣已見其由戢尾貫腮未知其

術是用乘良辰守通津望驗喁而注目聆澆澹以勞神乃  
歎曰深不測者水藏諸水者鱗營之何及獲之何因彼不  
脫於泉徒求於泉下彼不蕩於水奚求於水濱喪志而退  
問於漁人漁人曰噫子過矣君子謀不失利動必合理禽  
之中也先夫矰繳獸之獲也資乎弓矢夫吾子坐金隄降  
玉趾無留而窺其發發無筭而思其唯唯此所謂自包其  
羞不求諸己向若有具施之於水則和羹可待食肉茲始  
不爲緣木之難自叶忘筌之美斯言富哉感激而回求詹  
公之術盡任子之才器必備藝咸該將中否之不惑希取

舍之無猜羨之可以已也是以結網而復來

焦桐入聽賦

以冷然雅音至  
聽方識爲韻

聽之微者不必五音伊焦桐之逸韻契伯喈之明心氣逐  
炎炎始將隨於槁木聲飛烈烈終見用於雅琴當其大匠  
未收樵人所利圭葉零落孫枝殘瘁以薪見迷以竈求媚  
聲連而丹燄乍飛響送而紅星忽墜聞之者徒謂木之槁  
火之熾殊不知八音之珍佇五絃之至彼美中郎神妙無  
方樂無不審音無不詳聽執爨之間克諧律呂聞就燥之  
處乍合宮商乃言曰惜乎斯桐韻實天假可以加雕斲可

金定三月二  
以暢韶雅何混彼樗林而棄於薪者於是收質燄燄求音  
泠泠撲滅其色鱗皴其形被之以絃佇水流而山立鼓之  
爲操必鶴舞而魚聽則知桐之成器待其人而克定桐之  
有聲非其人而靡聽向若清耳不傳瓊材遂捐希聲率爾  
斲俗猶然則半死之根誰一收其餘燼孤生之幹將久滅  
於青烟桐之熱兮人之德焚身之缺兮躬忽見屈殊不知  
焦尾爲珍竟獲伸於多識至矣哉感知音者願是傲而是  
則

朔方獻千里馬賦

以題  
爲韻

駟彼名馬產茲元朔得遐方之勁氣是稟嚴凝應上聖之  
禎符其來繇邈固可以飾和鸞之鑣鑣就鈎膺之濯濯始  
其同羣豐草挺質寒鄉名超茲白瑞掩飛黃伊六轡之爰  
設非九重之孰當爾其走險鹿駭望雲龍驤繫之維之登  
歌不慚於西極若滅若沒獻狀聿來於北方於以效伏阜  
之勤於以釋長鳴之怨流離而走血來格獲落而執勒斯  
獻計鴻鵠之舉彼未居多涉燕宋之遙我方適願柔心有  
待逸足未宣權奇於絳闕之下沛艾於紫庭之前稟月未  
匹追風莫先所以闡幽都之美所以增華殿之妍旣佶且

閑軼其羣兮相萬視遠如邇導其路兮且千一人旣瞻八  
駿初比彼千駟花發六騶雲起其止也可齊乎足其行也  
無踰於里信愕視於華原而騰輝於良史伊茲駿之間出  
在前王而殊寡或鑾輅而見捐或鼓車而不捨我皇昭景  
福錫純嘏稱德以喻夫俊乂服勞以勸夫忠者豈惟同兩  
漢之帝獲千里之馬

萬年縣試金馬式賦

以漢朝鑄金爲  
名馬式爲韻

先賢鑄金之英爲馬之形馬無疆而致用金不朽而垂名  
瞻之在前則至寶山立寂然不動則異體峯平固將六龍

可驗八駿斯營遐追絕足遠契長鳴豈徒翫熒煌之彩眇  
熠燿之情哉始其模既全體將具思求絕塵之貌是假在  
鎔之鑄踴躍其液渥洼之形未出撲滅其烟浮雲之姿已  
露方中矩今圓中規勢倜儻兮精權奇誠可傳而可繼每  
不驅而不馳其巧旣畢安貞莫移豈貪夫而是徇諒工者  
之所爲若乃大閱羣駒旁搜萬國獻絳闕而咸萃充華殿  
而尚惑乃審厥象俾臻其極仰從革之輝光知代勞之軌  
則駑駘沓至自乖百鍊之形駟駿俱來允叶萬邦之式其  
狀惟肖其義孔昭仰沛艾以龍翥若驂驥而鹿超摧秣勿

施異乘黃之伏皐繫維罔及殊赭白之來朝翼翼雄姿煌煌壯觀恒引耀以錯落每騰精而泮渙牛以石兮多慚馳以銅兮非翫是知武皇之制博伏波之旨深用之則行昔飛聲於東道確乎不拔終成象於南金高門洞闢秘殿旁臨將萬古以駭目俾四方而宅心豈作賂大宛其形見棄爲神蜀郡厥祀方歆者哉固宜無逃於衆寡不昧於取舍永作鏡於域中比懸衡於天下則稱驥德頌駟牧者未若似是而非常以馬而喻馬

彈冠賦

以君子之交誠有所感爲韻

岌岌高冠是加於首將服之以入仕遂彈之而去垢纖埃不染知潔已之爲先法服是從明干祿之非久豈比裂之而無用挂之而勿有也當其貢公不仕王陽未榮風起緇布塵飛玉纓積歲月而無色混風姿而莫呈豈知點綴則價重拂拭則光生蓋以斷金之人未達於清世陸沈之士猶勞其赤誠是故置之而有待褚之而勿營洎夫大漢登庸伊人有所同松茂而柏悅將龍翔而鳳舉於是取章甫而言曰冠者首之飾人之規盛服將朝此爲大者結髮從仕曷莫由之吾方策名於丹闕委質於彤墀顧將盡飾以

爲美豈薄汚而見嗤及解彼珠纓彈於玉指彰久要之必  
信表從政之有使拂舊彩以增鮮振浮埃而暫起由是發  
光耀正容止朝廷濟濟具瞻夫哲人巾櫛鏘鏘用表夫君  
子則知碩量之所包賢人之與交其賤也樂夫伐木其貴  
也同夫拔茅則爵位相先者以彈冠而自鑒金蘭合契者  
因彈冠而有感故能致美搢紳不嬰垢氛將總會於元髮  
期入仕於青雲豈比夫晏子濯以入朝是稱賢相屈生彈  
於新沐方俟明君

佩刀出飛泉賦

以至誠所感靈  
泉爲生爲韻

貳師之伐大宛也耀武經聞王靈入絕域討不庭近取諸  
身拔寶刀之錯落上善若水出山溜而清冷則誠之所至  
危無不寧挹旣思於跋石利遂因於新礪當其大漠之北  
窮山所次萬流皆涸甘泉斯秘堯人不能以鑿井考叔徒  
稱其闕地思羣飲而駿奔懷載渴而麋至大兵懸命夸父  
之拔策是憂上將失容曹公之指梅莫致維石巖巖將破  
以至誠憂心慘慘將慰以元感乃拯經營陟崢嶸綴旒之  
急貫日之精念爐中鍛鍊之利成山下決蒙之情孤環出  
銛鏑明賴黑壤而甦啟迸元泉而可驚活活兮有甘井忽

開之兆泠泠兮奪醴泉自出之名飛流乍凝乎淬刃濯血  
又同於洗兵三軍激心始觀切玉之利萬夫駭耳俄聞漱  
玉之聲咸曰將軍發丹懇勞赤誠俾竭涸流濕枯槁增榮  
疊疊之流旣控清而引濁濟濟之衆咸出死而入生豈一  
勺之多實一瓢爲貴旣挹注之有待知福祿之來爲刀惟  
百鍊不剗其鋒銚泉則九重未存其屬沸此畫地之成川  
如開流之納泉酌焉不竭瞻之在前何盡心之愚若致滿  
腹之怡然向使以誠爲後以力爲先動而有悔鑽之彌堅  
則佩彼孟勞諒無施於礲墉拜同疏勒亦何望於潺湲於

戲人之有志物莫能禦刀爲短兵兮曷用泉居厚地兮不  
阻中石之箭處危疑而則那駐日之戈於精誠而誰與故  
能飛名域外獻功王所豈不以至誠如神達之於六府

請禁皇城六坊內朱雀門至明德門夾街兩面  
坊及曲江側近不得置私廟奏

奉宣今日已後百官並不得於京城內置廟者臣等伏據  
禮記云君子將營宮室宗廟爲先廡庫爲次居室爲後又  
韋彤五經精義對曰古制廟必中門之外吉凶大事皆告  
而後行所以親而尊之不自專也今令城外置廟稍異禮

文書於史籍恐乖聖政伏以朱雀門及至德門凡有九坊其長興坊是皇城南第三坊便有朝官私廟實則逼近宮闕自威遠軍向南三坊俗稱園外地至甚閑僻人鮮經過於此置廟無所妨礙臣等商量今日已後皇城南六坊內不得置私廟至朱雀門緣是南郊御路至明德門夾街兩面坊及曲江側近亦不得置餘園外深僻坊並無所禁冀不違禮意感悅人心臣等頻奉聖旨有事許再三論奏輒罄所見貴補聰明

覆廢罷讓皇帝廟奏

讓皇帝廟去月二十四日詔下太常寺委三卿及博士同  
詳議聞奏者臣等伏以讓皇帝追尊位號恩出一時別立  
廟祠不涉正統既非昭穆禘祫所及無子孫饗獻之儀親  
盡則疎歲久當革杜鴻漸所議禘祫之月時一祭者蓋以  
時近恩深未可頓忘故也今睿宗元宗旣已祧去又文敬  
等七太子中亦有追贈奉天承天皇帝之號當以停廢則  
讓帝之廟不宜獨存臣等參詳伏請准中書門下狀便從  
廢罷泐情定禮實議叶宜

請進士覆試後再行放榜奏

伏以禮部放榜已是成名中書重覆尚未及第若重覆之中萬不一定則放榜之後遠近誤傳其於事理實爲非便請今年進士堪及第者本司考試訖其詩賦先送中書門下詳覆候勅却下本司然後准例大字放榜

覆奏耐懷懿太子神主狀

准今月十日堂帖天寶初置七太子廟異室同堂國朝故事足以師法今欲聞奏以懷懿太子神主耐惠昭及悼懷太子廟不虧情禮又甚便宜送太常寺三卿與禮官同商量議狀者伏以三代已降廟制不同光武爲總立一堂羣

主異室親盡廟毀昭穆遞遷此蓋祖宗之廟也然則太子廟出於近或散在他處別置一室或尊卑序列共立一堂伏准國初太子廟散在諸方至天寶六載赦文章懷節愍惠宣等太子宜與隱太子列次同爲一廟應緣祭事並合官給號爲七太子廟又准大厯三年三月以榮王天寶中追贈靜恭太子神主未祔詔祔七太子廟加一室今懷懿太子爲姪以姪祔叔享獻得宜請於惠昭太子廟添置一室擇日升祔

創造禮神九玉議

邦國之禮祀爲大事珪璧之儀經有前規謹按周禮天地  
四方以蒼璧禮天黃琮禮地青珪禮東方赤璋禮南方白  
琥禮西方黑璜禮北方又云四圭有邸以祀天兩圭有邸  
以祀地圭璧以祀日月星辰凡此九器皆祀神之玉也又  
云以禋祀祀昊天上帝鄭元云禋烟也爲玉幣祭訖燔之  
而升烟以報陽也今與開元禮義同此則焚玉之驗也又  
周禮掌國之玉鎮大寶器若大祭既事而藏之此則收玉  
之證也梁氏崔靈恩撰三禮義宗云凡祭天神各有二玉  
一以禮神一則燔之禮神者訖事却收祀神者與牲俱燎

則靈恩之義合於禮經今國家郊天祀地祀神之玉常用  
守經據古禮神之玉則無臣等請下有司精求良玉創造  
蒼璧黃琮等九器祭訖則藏之其燎玉即依常制所冀國  
禮可久之文守而不失周官已墜之典舉而更新

### 定祀九宮儀注議

伏以九宮貴神位列星座往因致福詔立祠壇降至尊以  
稱臣就東郊以親拜在祀典雖云過禮庇羣生豈患無文  
思福黔黎特申嚴奉誠聖人屈已以安天下之心也厥後  
祝史不明精誠亦怠禮官建議降處中祠今聖德憂勤期

臻壽域兵荒水旱寤寐軫懷爰命臺臣輯興墜典伏惟九  
宮所稱之臣即太乙攝提軒轅招搖天符青龍咸池太陰  
天一者也謹按黃帝九宮經及蕭嵩五行大義一宮其神  
太乙其星天蓬其卦坎其行水其方白二宮其神攝提其  
星天芮其卦坤其行土其方黑三宮其神軒轅其星天衝  
其卦震其行木其方碧四宮其神招搖其星天輔其卦巽  
其行木其方綠五宮其神天符其星天禽其卦離其行土  
其方黃六宮其神青龍其星天心其卦乾其行金其方白  
七宮其神咸池其星天柱其卦兌其行金其方赤八宮其

神太陰其星天任其卦艮其行土其方白九宮其神天一  
其星天英其卦離其行火其方紫觀其統八卦運五行土  
飛其中數轉於極雖敬事迎釐不聞經見而範圍亭育有  
助昌時以此兩朝親祀而臻百祥也然以萬物之精上爲  
列星星之運行必繫於物貴而居者則必統八氣總萬神  
幹權化於混沌賦品彙於陰陽與天地日月誠相參也豈  
得繫賴於敷佑而屈降於等夷又據太尉攝祀九宮貴神  
舊儀前七日受誓誡於尚書省散齋四日致齋三日牲用  
犢祝版御署稱嗣天子臣圭幣樂成比類中祠則無等級

今據江都集禮又開元禮蜡祭之日大明夜明二座及朝  
日夕月皇帝致祝皆率稱臣若以爲非泰壇配祀之時得  
主日報天之義卑緣厭屈尊用德伸不以著在中祠取類  
常祀此則中祠用大祠之義也又據太社太稷開元之制  
列在中祠天寶三載二月十四日勅改爲大祠自後因循  
復用前禮長慶三年正月禮官獻議始準前勅稱爲大祠  
唯御署祝文稱天子謹遣某官某昭告文義以爲殖物粒  
人則宜增秩致祀稱禱有異方丘不以伸爲大祠遂屈尊  
稱此又大祠用中祠之禮也參之日月旣如彼考之社稷

又如此所謂功鉅者因之以殊禮位稱者不敢易其文是前聖後儒陟降之明徵也今九宮貴神既司水旱降福禳災人將賴之追舉舊章誠爲得禮然以立祠非古宅位有方分職既異其司存致祝必參乎等列求之折中宜有變通稍重之儀有以爲比伏請自今已後却用大祠之禮誓宜備物無有降差惟御署祝文以社稷爲本伏緣已稱臣於天帝無二尊故也

銀青光祿大夫檢校禮部尚書使持節梓州諸軍事兼梓州刺史御史大夫充劍南東川節度副

大使知節度事管内觀察處置靜戎軍等使上  
柱國長樂縣開國公食邑一千五百戶贈吏部

尚書馮公神道碑銘

并序

惟唐開成元年歲在執徐十二月三日檢校禮部尚書東  
川節度使長樂公享年七十薨於位天子不視朝一日贈  
以天官之秩是月公之喪歸於西都其來也梓潼之人如  
亡顧復其至也京師之人咸嗟殄瘁其親戚號於中唐而  
鄰里感其朋友慟於外寢而搢紳弔咸以公孝友忠信清  
廉正直寬仁偉度可以韜當世弼諧遠畧可以經大邦而

位不充量才屈於算斯所以感人深矣其明年五月克葬  
於京兆萬年縣崇道鄉白鹿原從先人塋禮也旣葬其孤  
累然泣血以公勲伐德善之狀請被於文而刻此石云公  
諱宿字拱之冀州長樂人漢光祿勲奉世廿五代孫也自  
光祿勲立功於漢其下十四葉立國王燕是爲昭成皇帝  
其下七葉至五代祖周烏氏侯諱早惠

闕一字

隋爲隰州司

戶皇朝爲婺州常山令常山生高祖皇婺州紉曹掾諱文  
儉紉曹生曾祖茂才高第括州松陽令諱道儀松陽生大  
父文林郎宋王府記室參軍贈禮部員外郎諱嗣員外生

先府君南昌令新安郡長史贈尚書左僕射諱子華咸以  
茂德光耿史牒僕射天寶中明皇以四子列學官時與計  
偕一鳴上第藏器不耀以孝節聞享年八十累贈尚書左  
僕射先妣彭城劉氏皇成都府參軍沔之女嬪則母範惟  
家之肥累贈彭城郡太夫人公即僕射之元子也奇偉倜  
儻與人誠直言無詭隨行不苟合望之也長戟森於武庫  
即之也大珪植於瓊田卅歲侍僕射府君廬於員外府君  
之墓左有靈芝產於埏隧白兔擾於松檟僕射惡其顯異  
抑而不言識者咸謂純孝殊祥又重之以陰德其門必大

也弱冠以工文碩學稱年廿六舉進士是時明有司即兵部侍郎陸公贇其人也又應宏詞科試百步穿楊葉賦雖爲勢奪而其文至今諷之後生以爲楷已而有志於四方歷東諸侯爲彭門僕射張公建封所器異因表爲試太常寺奉禮郎充節度巡官張公傑邁簡達尊賢禮能幕府始建羣彥翹首與公同升者李藩韓愈之倫皆諸侯之選及公曳裾之後有置醴之遇其書檄奏記公皆專焉及張公寢疾公常出入卧內獻替戎事一軍感其誠明迨其薨落也武夫感義閭里懷慕蚩蚩洵洵無帥乃亂立其子惜稱

留後焉未王命也先是李師古之叛也其將李洧以徐方効順至是師古將伐有喪且復故地公內則整訓叛徒明利害之鄉外則移檄敵人示逆順之理卒能寢師古之謀遏徐方之亂衛監戎於鋒刃之上免闔境於磔裂之勢公之力也而終身杜口不言定徐之功議者高其不伐及德宗以愔得衆因而善之表公爲留後判官試金吾衛兵曹公以危邦是戒倚門方切乞歸江左以奉色養已而越師潛章請置閫幄授大理評事徐之軍吏惜公之去也繼公職者害公之能也合爲他誣貶泉州司戶公得喪不形以

詩書自娛歲餘移

闕一字

州司戶太夫人終堂孺慕柴毀跼

於滅性喪復常從事浙右徵拜憲府監察歷太常博士凡

爲國家定諡皆

闕一字

善貶惡不吐不茹時人偉其文而與

其直遷虞部員外郎丁先府君艱藥杖在疚哀禮皆極旣

祥除都官員外郎憲宗時吳元濟以淮西叛詔相國裴公

東征於是妙選廷臣爲幕中

闕一字

由是表公爲彰義軍節

度判官於是有朱紱銀章之錫淮西平酬勞報功拜比部

郎中爲持權者所忌會韓文公愈以京師迎佛骨上疏切

諫忌公者因上之怒也誣公實爲之出刺歙州先是中書

舍人缺僉謂公之述作動合謨訓綸言之任旦夕待遷及一麾出守羣情大駭公則神怡氣暢視虧若成此則老氏之齊寵辱令尹之無喜愠也在歟周歲鋤兼并活矜寡有襦袴誰嗣之謠徵拜刑部郎中遷兵部郎中知制誥時問罪河朔書命疊委公應用神速不能自休詞理典奧文采煥逸大凡六百餘章爲染翰者程準天子以深州刺史牛元翼納忠効順詔除襄州節度使時重圍不解未克之官下江漢上游舟車四會久虛統帥弛紊由之因思文武全德姑攝其任上曰侍臣有魁岸奇表珥貂蟬者爲誰丞相

以公對上曰峴南留務斯人可矣爰命金印紫綬官相憲

丞倅

闕一字

以下

闕二字

下車則軍旅安

闕一字

閭里清寧後元

翼自

闕一字

內來詔公歸

闕二字

又或願借子翼且留一年或

追送君

闕一字

有逾百里其遺愛在去有如此者即日拜中

書舍人妄為飛語

闕一字

中

闕一字

改為太常

闕五字

遷散騎常

侍

闕六字

直

闕三字

之士

闕六字

試第其上下得人之

闕二字

為至

公遷華州刺史以州名犯先公諱固讓不拜復

闕二字

加集

賢殿學士

闕四字

同之阻命於

闕二字

也王

闕一字

興

闕二十一字

以

闕七字

之臣有才者宣撫之擇使數輩

闕三字

之事公以食君

之祿危事不字 闕一急國之字 闕三盡心遂字 闕二政字 闕四屬虐

暑溽雨泥行谷宿字 闕二險阻字 闕八不言字 闕一由是出入字 闕六

危者安之字 闕一者勇之棣城字 闕二公字 闕二助其字 闕二事

國有如此者矣三川浩穰尹正斯字 闕一時字 闕一之字 闕二公

理及字 闕二必信賞必罰寬人急吏字 闕二著無字 闕一兼

并字 闕一必字 闕六部曲字 闕五有字 闕二爲字 闕一吏字 闕六於杖下

禁止再字 闕一報政行工部侍郎加字 闕十曹郎議字 闕二

公以字 闕一路字 闕一以誅字 闕六之字 闕三以爲得字 闕十格後勅

五十卷字 闕一百字 闕七兵部侍郎進爵爲公會衆字 闕四上字 闕四

字之忠重推轂之闕二檢校禮部尚書使持節梓州諸軍

事兼梓州刺史御史大夫充劍南東川節度副大使知節

度事管內觀察處置靜戎軍等使上柱國公闕一節闕一

臨整闕二紀外闕三內闕二毗推赤心於三軍之腹而闕一

字郡以六闕三禮樂修明苛闕一用去闕四國人闕二

心太和初闕一師闕二南闕一入寇抵於闕二犬掠而闕一

字公以善闕一不闕五隨則無惠安必闕三十上問之曰

守土之臣當如是乎豈闕一山鎮一方亦可波及他闕一

詔用闕四巫之闕五公闕四十嘗一旦天助十萬錢於我

家故鄉人號爲孝馮家吾今壽登

闕二字

位列方面陰德之

闕一字

其可誣乎

闕四十七字

重

闕一字

家

闕三字

之以

闕四十字

曰命之

短長天

闕三字

之

闕五字

吾不

闕一字

也

闕五十六字

天下表其

闕八字

貞百

莊恪太子哀冊文

維大唐開成三年歲次戊午十月乙酉朔十六日庚子皇

太子薨於少陽院十七日辛丑遷座於大吉殿十一月乙

卯朔二十四日戊寅命冊使太子太師兼右僕射門下侍

郎國子祭酒平章事鄭覃副使中書侍郎平章事楊嗣復

持節冊諡曰莊恪十二月乙酉朔十二日景申葬於驪山之北原莊恪陵禮也玉琯歲窮金壺漏盡祖奠告徹哀笳將引庭滅燎而月寒路搖旂而風緊皇帝念主鬯之缺位悼佩觿之天年銅樓已閉銀牒徒懸方追思於對日遽冥寔而賓天典冊具舉文物咸備爰詔侍臣顯揚上嗣其詞曰

皇矣帝緒肇基綿古種德尊道宗文祖武上聖開成天下和平儲祉發祥是生元良覃訏之初岐嶷用彰蘊才游藝玉裕金相旣免孩提是加封殖俾維城於東魯錫介珪於

上國辭榮朱邸正位青宮尊師重傅養德含聰畏馳道而  
不絕問寢門而益恭招賢警戒齒冑謙冲冀日躋於三善  
奉天慈於九重漢莊好學旣顯於外魏丕能文方循於內  
美不貳於顏過嘉得三於鯉退焜燿甲觀鏗鏘瑜珮方積  
善於爲山何反真而游岱嗚呼哀哉憂兢損壽沉疴始邁  
羣望並走百靈宜祐異客之問徒爲越人之方靡救占前  
星之掩曜知東朝之降咎天垂象而則然人由已而何有  
嗚呼哀哉稅駕承華兮即宮夜臺鳳笙長絕兮蜃輅徐來  
啟青宮而右出歷元灞而左迴度凋林兮魂斷入曠野兮

心摧水助挽而幽咽雲帶翼而徘徊悲佳城之已掩見新  
廟之方開嗚呼哀哉授經兮曷期執紼兮增歎九原作兮  
何嗟及七日還兮安可希有少海之波逝無西園之蓋飛  
商山之羽翼已散望苑之賓客咸歸瑟彼玉簡閱於泉扉  
用傳信於文字願不昧於音徽嗚呼哀哉